

Rombakan Kabinet

Kementerian penting terlibat

KUALA LUMPUR, Khamis — Semua Kementerian penting kecuali Kewangan, dijangka dirombak dalam Kabinet baru yang akan diumumkan oleh Perdana Menteri Datuk Seri Dr. Mahathir Mohamad Isnin ini.

Sumber-sumber yang mengetahui berkata, Perdana Menteri akan memegang portfolio utama Pertahanan yang disandang oleh Tun Hussein Onn.

Datuk Musa Hitam, yang dipilih sebagai Timbalan Presiden UMNO dalam pemilihan UMNO bulan lalu, akan menjadi Timbalan Perdana Menteri dan kemungkinan juga bertanggungjawab terhadap Hal Ehwal Dalam Negeri.

Beliau juga dijangka diberi tugas penting mengawasi pelaksanaan rancangan pembangunan, termasuk projek-projek di bawah Rancangan Malaysia Keempat.

Menteri Luar, Tengku Ahmad Rithauddeen, yang dipilih sebagai salah seorang Naib Presiden UMNO, kemungkinan diberi portfolio Perdagangan dan Perindustrian, yang sekarang dipegang oleh Datuk Seri Dr. Mahathir.

Beliau dijangka dibantu oleh Datuk Shahrir Samad, Timbalan Menteri Kewangan sekarang. Datuk Najib bin Tun Razak, yang pada masa ini Timbalan Menteri Pelajaran, dijangka mengisi tempat Datuk Shahrir.

Menteri Dalam Negeri Tan Sri Ghazali Shafie, yang dianggap sebagai pakar hal ehwal dunia dan dikenali di peringkat antarabangsa, mungkin diberi portfolio Kementerian Luar.

Beliau ialah pegawai awam terkanan di Kementerian Luar selama hampir satu dekad sebelum menyertai Kabinet pada 1970.

Portfolio pelajaran, yang masa ini dipegang oleh Datuk Musa, dijangka diberi kepada Menteri Wilayah Persekutuan, Datuk Dr. Sulaiman Daud, seorang Naib Presiden Parti Pesaka Bumiputera Bersatu (PBB), Sarawak.

Ini bukanlah kali pertama seorang pemimpin PBB akan menyandang jawatan tersebut. Datuk Patinggi Tan Sri Haji Abdul Rahman Yaakub, sekarang ini Yang Dipertua Negeri Sarawak, memegang jawatan tersebut antara 1969-70 sebelum pulang untuk memimpin Kerajaan Negeri.

Timbalan Menteri Wilayah Persekutuan, Datuk Abdullah Ahmad,



DATUK MUSA HITAM

mungkin dinaikkan menjadi Menteri di Jabatan Perdana Menteri, kemungkinan bertanggungjawab atas kementerian yang sama.

• **Seliasaha** Parlimen Kementerian Perdagangan dan Perindustrian, Encik Abdul Rahim Tamby Chik, difahamkan dinaikkan menjadi Timbalan Menteri dan akan menjadi salah seorang dari dua Timbalan Menteri di Kementerian Dalam Negeri.

Ketua Pemuda UMNO dan Timbalan Menteri Pertanian, Datuk Haji Suhaimi Datuk Haji Kamaruddin, dijangka berpindah ke Kementerian Pelajaran dengan jawatan yang sama.

Terdapat juga spekulasi Encik Sanusi Junid akan dinaikkan menjadi menteri penuh.

Bahan asal dari Arkib
Negara Malaysia